

Dene e'ba'basu köcökpa te Pawülü ba fü Timoteyo 2 Timoteyo

Masere si-ngü

Dene e'ba'basu köcökpa te Pawülü tima fü Timoteyo. Fütanga gina köcökpa te engu tima fefe, fü wü kpara ka Miri ka wü *Rüma ayia azoro Pawülü, ai engu, agü gbü ku agbü Rüma kpala. Pawülü ba köcökpa ne o engu ngbü fi gbü ku la. Ah ba fü Timoteyo, gü ba dene, “Gbü jia ni, sikipi ka kpi ka-ni koro eyi gbamari.” Angü ah fi gü ba, *Kayisara, Miri ka wü Rüma la, ena amörö ni amörö asidi. Te di bala, Pawülü kpe cürü nda de, angü ah wu kpo, gü ba, Me ladü te ena aküwa ni gbü sü ka-ye agbü kpi, fi mere badi. Gümü Timoteyo ngbü emere engu efa sü, fü ah amala fü Timoteyo, de engu yia kere, akoro kpaka ni agbü Rüma. Kpah bala, ah ri Timoteyo de mere bi züka riri, de ah rü kpekpeke sidi nga ni, da eri wü *kpara ka Yesu mbi mbi mbi.

Te mü ena atanga köcökpa ne enatikine, mü ena amaka mere bi züka riri, te ena ato wazi fü mü, teka fü mü arü kpekpeke, da elala gbü ngü ka Me.

Wü ngü te Pawülü ba gbü köcökpa ne, wüh dene.

Sapita 1:1-2:13 Ngü teka tima ka Timoteyo

Sapita 2:14-3:9 Ngü ka siti riri ka wü mürü

fiti

Sapita 3:10-4:8 Ngü teka Ngari Me

Sapita 4:9-22 Adu ngü

Dene mandī ka Pawülü fū Timoteyo

¹ Wayi bala, Timoteyo, de-ra Pawülü, ma ba köcökpa ne fū mü me-ra. Ma de *mürü tima ka Yesu Kurisito kpah baka e te mü wu kpo, angü Me fe ra ta me-ye, teka de ma di emala ngari Yesu fū wü kpapa, gü ba, “Yesu *Kurisito kpi teka aküwa wü kpapa fi mere badi.” ² Timoteyo, mü de züka ye ra. Ma to mandī fū mü fa sü. Wö nih, Me, ake Miri Yesu Kurisito, di de mü, de wüh wu cinga mü, da eto züka gu ngü fū mü, de *züka maguma wü.

Dene ngü ka-mü te ngbü eto tadu fere

³ Timoteyo, ye ra, ma ngbü egbo nga iri Mere Me teka ngü ka-mü. Ma de kpapa te ma ngbü emere tima ka Me de maguma ra biringbö, kpah ba e ta te wü kundu ra ngbü emere ne. Ma egbo nga iri Me, angü mü to maguma mü 'buru fū Me kpah bala. Ma ngbü efi nga mü ra de biti 'buru, da eku gba fū Me teka mü, de ah to wazi fū mü. ⁴ Gümü mü ngbü eke ra efa sü, angü ma ngbü efi nga gba ka-mü, ta te mü ku de ngura, gbü siki te nih ye süka nih tete. Nih ena adu awu te-nih neh elaye, teka fū nih angbü de tadu? ⁵ Ma gbo nga iri Me teka mü, angü ma wu kpo, ga, mü le ngü ka Yesu Kurisito eyi de maguma mü biringbö. Wü ni mü Yunisi ake ata mü Loyisi, wüh kpo de ngü la eyi gügü. Titine dene, ma wu kpah eyi, ga, mü lala kpah eyi gbü nga Yesu.

Dene ngü teka tima te Me to fū mü

⁶ Timoteyo, ye ra, mü o to mü 'buru teka amala ngari Me fü wü bu mü, angü dela tima ka Me, te engu to fü mü me-ye, gbü sikipi ta te ma o kpa ra gbü nzö mü tete. ⁷ Mü mere tima la amere kpekpeke, angü Me to wazi ka *Nzila Wazi ye eyi emaguma nih, teka tima ka-ye la. Te di bala, mü ti akpe cürü de, angü Me ngbü eto wazi fü nih, teka amere tima ka-ye di kpekpeke, de züka fingangü gbü nzö nih, kpah da ele wü bu nih de maguma nih.

⁸ Te di tine eyi bala ne, Timoteyo, mü rü arü kpekpeke, teka adi emala ngari Miri Yesu fü wü kpara. Mü mere e akpe cürü de. Mü wu ngü te ngbü emere ra kpakine ne eyi, angü wüh zoro ra, gü eyi gbü ku, teka ngü ka Miri Yesu. Te wüh le ato cinga te mü kpah bala la, mü mere e akpe cürü de, angü Me ena ato wazi fü mü me-ye kpah baka nda-ra. ⁹ Angü Me küwa nih eyi, o nih eyi ba züka wü kpara ka-ye, teka de nih di emere wü ngü te ena areke gbü jijia. Me küwa nih, neh teka ne? Teka gara züka ngü te nih mere? Ah bala de! Me küwa nih teka mere lele ka-ye, angü ah le ngü la me-ye, de *züka maguma ye. Ta gügü te enga gina, o engu mere kotö ne la de, engu ga, "Ni ena aküwa wü kpara teka ngü ka Yesu *Kurisito." ¹⁰ Enatikine Yesu Kurisito koro eyi teka aküwa nih fanü. Angü Yesu fa wazi kpi eyi. Te di bala, te nih to maguma nih fü Yesu, nih ti akpi fi de. Te küte nih kpi la, Me ena ato to küte fü nih, fü nih aküwa fi mere badi. Dela eyi ngari Yesu, te Me to eyi fü nih, de nih di emala fü wü bu nih.

¹¹ Ngari Yesu la, ah de ngü te Me fe ra, tima,

teka adi emala fü wü kpara, da erī ewü di. ¹² Dela si-ngü te ewü zoro ra, gü agbü ku tete na ne. Ma kpe cürü kpah de, angü ma to maguma ra eyi fü Yesu Kurisito. Ma wu eyi, gü ba, engu tī ace ra nda de. Yesu de kpara te to tima la fere me-ye. Ah ngbü fī bü eto wazi fere, teka amere tima ka-ye la di. Te di bala, ma wu kpah kpo, ga, tima ka Yesu tī anza nda de, zalü akoro di gbü sīkpī de te engu ena adu akoro tete na.

Dene ngü teka zūka rīrī ka Me, te mü ena angbü erī wü kpara di

¹³ Timoteyo, ma de kpara te ma rī mü de ngari Me la me-ra. Mü o to mü teka ngü la, de mü di erī wü bu mü di. Mü di elala fī bü gbü nga Yesu, de mü le wü bu mü de maguma mü biringbö, angü Yesu ena ato wazi la fü mü me-ye. ¹⁴ Ngari Me la, ah de kpeke ngü te engu to fü mü. Mü mere e afü ngü la de. Mü zoro ngü la de kpa mü 'basu, fü mü adi emala fü wü kpara, da erī ewü di. Angü *Nzila Wazi Me ladü emaguma mü, da eto wazi fü mü teka tima la.

¹⁵ Timoteyo, ngü te wü *kpara ka Yesu agbü tö ka Asiya mere ra di, mü wu kpo. Angü, te wüh je, gü ba, “Miri ka wü *Rüma zoro ra eyi, gü agbü ku,” ne, fü wü Figelo ake Eremogene ayia afü te-wü, de wü bu wü 'buru, ba wü kpara te ewü wu ra de la. ¹⁶⁻¹⁷ 'Duwa duu Ünēsiforo te kpe cürü de. Angü te engu koro kpa gbü Rüma kpakine, ah to te-ye teka agīrī ra. Te engu je nga ra, fü ah adu anü zalü aceka ra, agbü ku. Fü ah ale ta-ngü te ra afa sü. Miri Yesu di de engu, da ele ta-ngü tete, de wü kpara kaka ka köti nde

'buru. ¹⁸ Ünesiforo de kpeke kpara fanü. Kpeke tima ta te engu ngbü emere fere, de wü kpara ka Me kpaka yi, agbü Efeso kpala ne, mü wu kpah eyi. Ah le de Miri Yesu le ta-ngü tete, de *züka maguma ye, gbü *adu sïkpï, te engu ena akolo ngü ka wü kpara tete, te gara.

2

Dene ngü te ma emala fü mü, de mü rü kpekpeke

gbü wazi ka Yesu

¹ Timoteyo, mü mere e ace ra de, angü mü fere baka ye ra. Mü rü nda-mü kpekpeke de wazi ka Yesu *Kurisito. ² Mü je ngari Yesu Kurisito ta gömö ra, gbü jia mere bi wü kpara. Ah le de mü lala eküte ngari Yesu la, fü mü adu agiri kpeke wü kpara, te jia ewü mba amba. Fü mü amala ngari Yesu la fü ewü, da eri ewü di, teka fü ewü adi eri wü bu wü di, sidi nga mü.

³ Timoteyo, te mü ena amaka cinga, teka ngü ka Yesu Kurisito la, baka ngü de te ewü mere ra di ne, mü mere e afi nga ngü de. Mü i maguma mü ai kpah ba nda-ra. Angü nih de wü marajümiya ka Miri Yesu Kurisito. ⁴ Te ah bala, nih o fingangü ka-nih 'buru fü Miri Yesu, angü marajümiya o to ye teka wü gara wü ngü ka koti nda de. Ah ngbü eo fingangü ka-ye 'buru teka mere kpara ka-ye, teka amere wü ngü te ena areke gbü jijia na. ⁵ Ah kpah baka kpara te ngbü

emere kalafiyi.* Angü, te engu le woro gbü züka kaje de la, wüh tì agbo nganga na, anga ato takpa fefe kpah de. Kpah bala, ah le de mü mere tima ka Yesu gbü züka kaje, teka fù mü amaka takpa gbügbü na. ⁶ Te mü sö e ka-mü kpa gbü yì, ah le de mü mere tima engu la kpekpeke, teka fù mü amaka mere bi zü-e gbü kpìrì kaka. ⁷ Dela wü ngü de bata te ma le amala fù mü, teka tima ka Yesu Kurisito. Mü fì nga wü ngü la mbi mbi mbi, fù Miri Yesu agü tamu si-ngü la fù mü me-ye.

⁸ Mü rü kpekpeke, da efi nga ngü ka Miri Yesu Kurisito, kundu ye *Davidi, fù mü amaka wazi gbü ngü la. Angü te engu kpi, fù Me adu azükü engu gbü kpi la. Dela ngari Yesu de te ma ngbü emala fù wü kpara 'buru. ⁹ Wü vügü ngbü eto kuru te ra teka ngari Yesu la, angü wüh zoro ra eyi, i de nyari baka siti kpara. Ma fì nga ngü la nda-ra de, angü wüh tì ai ngari Yesu nda-wü de. Ngü la ngbü fì bü da ewü ka-ye gbü wü sü 'buru. ¹⁰ Gbü wü ngü la 'buru, ma kpe cürü nda-ra de. Ma i maguma ra, teka ne de, angü ma ngbü efi nga wü gara kpara, de te Me fe ewü eyi ne. Ma ngbü fì bü da emala ngari Yesu fù wü kpara, teka fù ewü ato maguma wü fù Yesu Kurisito, fù ewü aküwa agbü sü ka Me, agbü kpì kpala fì mere badi.

¹¹ Wayi, Timoteyo, Yesu Kurisito de züka *E-küwa-nih! Mü di efi nga züka ci ka-nih, te gü ba dene,

* **2:5** 2:5 Kalafiyi anga kulakula de wutu ka woro, te wü kpara ngbü ego woro, teka akoro te enga gina, anga akoro gina kpara gbü woro la.

Nih ce te-nih fü kpi baka Yesu,
Fü nih azükü gbü kpi kpah bakaka na.

¹² Nih rü kpekpeke gbü ngü ka Yesu,
Fü Yesu ao nih ba cögbörö wü kpara ka-ye te
gara.

Nih mere e ace ngü ka Yesu de,
Angü Yesu ena ace ngü ka-nih kpah bala.

¹³ Te nih le ngü ka Yesu de,
Yesu ena amere wü ngü 'buru de te engu mala
la.

Ah tü ace ngü ka-ye nda de.
Dela kpeke ngü fanü fanü. Mü fi nga ngü la, fü
mü amaka wazi gbügbü na.

Dene ngü te ma le amala fü mü teka yiki

¹⁴ Timoteyo, ngü de te ma mala fü mü la, ah
de mere kpeke ngü. Dela ngü te mü ena angbü
erī wü bu mü gbü tima ka Me di. Mü rī ewü
mbi mbi mbi, da emala fü ewü kpekpeke de iri
Me, gü ba, “Wüh mere e aga yiki gbü ngü ka
Me de.” Angü te wü cögbörö kpara ngbü ega
yiki esüka wü la, ah ka-ye de tondö ngü. Te
wü gara wü di enga ni nih ena aje tondö ngü
la bala, nzö ewü ena asiti, fü fingangü ka-ewü
akoro faaa, fü ewü ace ngü ka Me ka, teka ngü la.

¹⁵ De-mü Timoteyo, mü o fingangü ka-mü 'buru,
teka fü mü adi ba züka kpara gbü jia Me. Mü
mere tima ka-mü kpekpeke, angü Me to tima la
fü mü me-ye. Mü rī wü kpara de zu ngü ka Me.
Mü mere ngü la bala, teka fü mü angbü de tadu,
gbü sipi te mü ena arü engagira Me tete.

¹⁶ Mü di ekpe ngü ka yiki akpe, angü yiki
de tondö ngü, te siti gbü jia Me fa sü. Wü kpara

te ewü ngbü ega yiki, da efüfü ngü ka Me afüfü ne, wüh ena adürü te kaje ka Me asidi. ¹⁷ Riri ka-ewü la, ah baka mere ambalö eküte lö kpara, te ena asiti fingangü ka wü *kpara ka Yesu asiti. Wü Imeneyo ake Filito de wü bu wü, wüh ngbü erü wü kpara de siti riri la me-wü. ¹⁸ Angü wüh ngbü esu wu, ga, “Me zükü nih gbü kpi eyi.” Töndö riri ka-ewü la siti nzö wü gara kpara eyi, fü ewü adürü te kaje ka Me asidi. ¹⁹ Nih, de te nih di nda-nih zu wü kpara ka Me fanü fanü ne, ah le de nih lala eküte zu ngü ka Me. Nih fi la nga mere kpeke ngü, de te wüh ba gbü *Ngari Me, gü ba dene, “Me wu wü kpara ka-ye eyi. Wü kpara te ewü le ngü kaka de ne, ah wu ewü kpah kpo.”† Wüh ba kpah gara ngü gbü Ngari Me, gü ba, “Wü kpara te ewü ra fü Me, ah le de wüh ce *siti ngü ka-wü asidi.”

²⁰ Te di bala, Timoteyo, ah le mü di emere züka ngü te reke areke gbü jia Me. Ah ba e te mü ena anü agba mere miri, mü ena amaka züka wü ndü'ba te su asu, teka ato ngu di fü cögbörö wü kpara. Mü ena amaka kpah wü siti külü ndü'ba, te ngbü eyu ayu, te wüh ngbü eto ngu fü wü labi gbügbü na. ²¹ Te kpara ce siti ngü ka-ye la 'buru, fü ah angbü *nzila la, ah ena angbü ba züka ndü'ba, te ena areke gbü jia Miri ka-ye, teka fü engu amere züka tima ka-ye di. ²² Te di bala, mü mere e amere wü siti ngü baka wü bu mü, wü ka'dörö ne, nda-mü de. Mü kpe ngü la akpe. Mü o to mü teka adi emere wü züka ngü te ena areke gbü jia Me. Mü lala eküte ngü ka

† 2:19 2:19 Mü ena amaka ngü la gbü Namba 16:5.

Me. Mü le wü kpara de maguma mü, da engbü ziii de wü bu mü, wü kpara te ewü le ngü ka Me de maguma wü biringbö ne.

²³ Ye ra Timoteyo, mü di ekpe ngü ka yiki akpe. Wü kpara te ewü ngbü ega yiki, da efüfü ngü ka Me afüfü ne, wüh wu ngü mbi mbi nda-wü de. Mü mere e adi engbü de ewü de, angü ngü la ena akoro baka gü esüka yi. ²⁴ Te mü de kpara ka tima ka Me la, mü ti amere tima ka Me de gü nda-mü de. Ah le de mü ngbü de züka maguma mü, da erü wü kpara ferrre. ²⁵ Anga te gara kpara le aga yiki, mü ri engu kpah ferrre. E-wu neh da, Me ena adu afü fingangü kaka la, fü engu adu afü maguma ye, ale zu ngü ka Me. ²⁶ Te di bala, fingangü kaka ena adu areke, fü ah ayia aküwa gbü yimba ka *Satana. Angü yiki la, ah de ngü ka Satana. Satana fiti kpara la me-ye, de ah mere tima ka-ni, ka Satana.

3

Dene ngü ka siti wü kpara gbü wü sikipi ne

¹ Timoteyo enga ra, dene kpeke ngü te ma le amala fü mü. Nih, te nih to maguma nih eyi fanü fanü fü Me ne, wü vügü ka-nih ena asibi afa sü, zalü akoro di gbü sikipi te Yesu ena adu akoro tete na. ² Angü siti wü kpara fa gbü sikipi ne eyi sü. Wü gara ewü le wü bu wü de. Wüh le 'duwa ngü ka-wü, da eo to wü 'buru teka angbü emaka jiase. Wü gara ewü ngbü da ecu ngü wü, da egbo nga iri wü, da esoko wü bu wü. Wü gara ewü je ngü ka wü wö wü de. Wüh fi nga wü kpara te ewü ngbü ele ta-ngü te ewü kpah de. Wüh ngbü

fi bü da emere wü ngü, te siti gbü jia Me fa sü.
³ Wüh le wü mürü wü agba wü kpah de. Wüh wu cinga kpara 'buru de. Wü gara ewü ngbü emala ambala'ba eküte wü bu wü. Gara ewü je riri 'buru 'buru de. Gara ewü de mürü gü. Wüh le amere züka ngü nda-wü kü de. ⁴ Wü gara ewü ngbü efiti wü bu wü de mani, eto fü wü vügü. Wü gara ewü de wü mürü kögö-nzö. Wü gara ngbü e'du ngü wü, gü ba, "Ani de kpeke kpara! Ani wu ngü fa sü!" Wüh le ngü ka Me nda-wü 'buru 'buru de. Wüh le ka-wü 'duwa ngü de füh kotö ne, angü ah ngbü eto tadu fü ewü me-ye. ⁵ Gara ewü gü ba, "Ani de kpara ka Me," amba maguma ewü ka-ye 'basu 'basu. Ngü ka-ewü ti de ngü ka Me nda de, angü wüh wu wazi Me nda-wü kpah de. Mü di ekpe wü kpara la akpe. Mü mere e adi engbü de ewü de.

⁶ Gara siti wü kpara baka e la eyi ladü, te ewü ngbü efiti wü kpara. Angü wüh ngbü ekoro agba wü kpara, fü ewü akpo da emala töndö riri fü ewü, gü ba, ah de riri ka Me. Fü ewü afiti wü kpara, te ewü wu ngü mbi mbi de, baka wü gara würüse, te ewü ngbü ekpe cürü, teka mere bi *siti ngü ka-wü. Angü wazi ewü teka ace siti ngü ka-wü la di nda ma. ⁷ Wüh ngbü ta ele awu zu ngü ka Me, amba wüh ti awu ngü la de, teka siti riri la. ⁸ Wü kpara te ewü ngbü efiti wü kpara de töndö riri de bala, wüh de wü vügü ka Me, kpah baka Yane ake Yambere tane,

te ewü di de wü vügü ka *Müse ne.* Wü mürü fiti la ngbü eo fingangü ka-wü 'buru teka siti ngü. Te di bala, Me ena ato kuru te ewü ato. ⁹ Fü ngü ka-ewü anza. Angü wü kpara 'buru ena awu töndö ngü ka-ewü la, kpah baka e ta te wüh wu töndö ngü ka wü Yane ake Yambere ne.

Dene ngü te ma emala fü mü, mü lala eküte ngari Me

¹⁰⁻¹¹ De-mü Timoteyo, ah le de mü rü kpekpeke kpah baka ra. Mü wu ngü te ma ngbü emere ne 'buru kpo. Mü wu ngü te ma ngbü erī wü kpara di kpah kpo. Mü wu eyi, gü ba, ma ngbü eo jia ra fi bü teka tima ka Me. Mü wu kpah kpo, gü ba, ma ngbü eo to ra 'buru teka ngü ka Me, fü ra angbü kpah ele wü bu ra, de maguma ra 'buru. Mü wu mere cinga te wüh to eküte ra, teka ngü ka Yesu Kurisito ne, kpah kpo. Mü wu kpah kpo, gü ba, gbü wü ngü la 'buru, ma rü fi bü kpekpeke. Mü wu ngü ta te mere ra agbü Atiyokiya ake İkonioyo bete Lisitera ne kpah kpo.† Amba fü Miri Yesu ayia aküwa ra gbü wü ngü la 'buru. ¹² Angü wü kpara 'buru te ewü le afa nga Yesu Kurisito, wüh ena amaka cinga füh kotö ne amaka bala. ¹³ Amba siti riri ka wü mürü fiti la ena anü fi bü kpa engagira nü. Wüh ena angbü fi bü da efiti wü kpara, da eo maguma wü teka siti riri ka-wü la.

* **3:8** 3:8 Wü Yane ake Yambere, wüh de wü mürü talara, ta te ewü mere tima fü mere miri ka Ezepeito. Mü ena amaka ngü la gbü buku ka Gogo ka wü Yisarayeile 7:10-13. † **3:10-11** 3:10-11 Mü ena amaka ngü la gbü Mürü Tima 13-14.

14 Timoteyo, enga ra, te di bala ne, ah le de mü rü kpekpeke, da elala eküte zu ngari Yesu, te mü je gömō a ne. Mü wu eyi, gü ba, ah de zu ngü fanü fanü, angü a mala ngü la fü mü me-a. 15 Kpah bala, mü maka ngü la kpah eyi gbü *Ngari Me, angü mü kpo da etanga ngü la kü gügü, gbü jaji te mü. Angü Ngari Me la, ah de kpeke ngü, te gü tamu kaje eyi fü mü, teka fü mü ato maguma mü fü Yesu Kurisito, fü mü aküwa. 16 Angü wü kpara te ewü ba Ngari Me la, wüh ba ngü la ta 'buru esa ri Me. Me to ngü la fü nih, teka ari nih de züka riri, kpah teka agü tamu wü *siti ngü ka-nih fü nih, kpah teka ato wazi fü nih, de nih di emere wü ngü, te ena areke gbü jia Me di. 17 Te ah bala, te mü de kpara ka Me la, ah le de mü di etanga Ngari Me la, teka fü mü awu züka ngü, de te ngbü ereke gbü jia Me. Fü mü amaka kpah wazi, teka amere tima la di.

4

Dene ngü te mü ena amere sidi nga ra

1 Timoteyo, enga ra, ma ngbü emala ngü ne fü mü kpekpeke, gbü jia Me ake Yesu *Kurisito, te di de Miri ka-nih ne, angü sikipi ka dudu kaka eyi gbamari. Ah ena adu akoro füh kotō ne, teka aye süka ngü ka wü kpara 'buru. 2 Te di bala, ah le de mü di fi bü emala ngari Yesu fü wü kpara gbü wü sikipi 'buru. Anga te ewü le aje ngü la kpah de la, mü mere e ace da emala fü ewü ndamü de. Mü di eri wü kpara te ewü ngbü emere *siti ngü, de wüh ce ngü la asidi. Mü di kpah eto wazi fü mene ewü, de te ewü ngbü emere züka

ngü ne, teka de wüh nü de ngü la kpa engagira nü. Mü di erī ewü 'buru ferrre, de züka maguma mü. ³ Mü mere e ace da erī ewü de, angü te gara, mere bi wü kpara ena ace da eje riri ka Me, angü gümü siti wü ngü ena angbü eke ewü. Te di bala, wüh ena angbü egiri wü gara kpara, te ewü ena angbü erī ani de wü gara riri kpikpi ye kpikpi ye, te ena ati kpini de mene ngü, te ani ngbü ele. ⁴ Wüh ena ace zu *ngari Me, fü ewü adu kawü, adi eda güje wü, teka adi eje töndö wü lara ngü. ⁵ Amba de-mü, Timoteyo, ah le de mü ngbü nda-mü da emere tima ka Me gbü züka kaje, ba e te Me to fü mü. Mü di emala ngari Yesu fü wü kpara, anga te wüh to cinga te mü la, mü mere e akpe cürü de. Mü rü kpekepeke, de mü ai maguma mü baka kpeke kpara.

⁶ Dela ngü te ma le amala fü mü enatikine, teka fü mü adi emere fütanga kö ra. Angü sikipi ka kpi ka-ra eyi ghamari. Ah de sikipi te wü vügu ena amörö ra tete, teka ngü ka Yesu Kurisito. ⁷ Ma wu eyi, gü ba, tima ta te Miri Yesu to fere ne, ma mere nza eyi 'buru, baka kpara te mere kalafiyi* ka mere woro, de wazi ye 'buru. Ma o to ra 'buru teka amere gü de wü vügu ka Miri Yesu, fü ra ayia afa ewü, angü ma lala fi bü fütanga Miri Yesu. ⁸ Te di bala ne, ma wu eyi kpo, gü ba, Miri Yesu ngbü eyi nzo, teka ato takpa fere teka tima la. Gbü sikipi te Yesu ena adu akoro tete ba Mere Miri, ah ena agbo nga iri ra, angü engu wu kpo, gü ba, ma mere züka ngü eyi gbü jia ni. Angü

* **4:7** 4:7 Kalafiyi anga kulakula de wutu ka woro, te wü kpara ngbü ego woro, teka akoro te enga gina, anga akoro gina kpara gbü woro la.

Yesu de züka Miri, te wu da eye süka ngü ereke areke. Ah ena ato züka ngü kpah bala fü gara wü kpara 'buru, te ewü o jia wü teka sïkpï, te engu ena adu akoro tete na ne.

Dene adu ngü ka-ra

⁹ Timoteyo, enga ra, mü giri kaje teka fü mü akoro kpaka ra kpakine kere. ¹⁰ Angü ma kpakine bü kpikpi ra. Ma tima gara wü bu ra ne eyi 'buru agbü wü gara sü. Keresekene nü sü eyi agbü Galatiya. Tito nü sü nda-ye agbü Dalümatiya. Nda Dema, ah ce ra ta nda eyi gügü, teka gümü e de füh kotö ne. Ah tadu ka-ye eyi agba ye, agbü Tesalonika. ¹¹ Kpara te di ede ra kpakine, ah ka-ye bü de Luka kpikpi ye. Te di bala ne, mü koro kere, de mü za Marako zalü, mü koro de engu akine, angü engu de kpeke kpara te ena ale ta-ngü te ra, gbü tima ka-ra ne. ¹² Ma tima Tikiko kpah eyi agbü Efeso. ¹³ Te mü te ekoro la, de mü za mere bongö ka-ra, ta te ma ce kpa gba Karapo agbü Türüwa kpala ne mini. Mü za kpah wü köcökpa ka-ra, mü koro di 'buru, bete mene ewü te ewü ba gbü wü konü ne.

¹⁴⁻¹⁵ Amba mü ceka te-mü mbi teka ngü ka Alekezanda, mürü boro la, angü ah mere ra ta esiti. Mü ceka 'be! E-wu neh da, engu ena aga, "Ni mere mü kpah bala," angü engu ka-ye de mere siti vügü ka tima ka-nih! Amba Me ladü! Ah wu ngü kaka-na la 'buru kpo!

¹⁶ Ta, gbü gina sïkpï te wüh ï ra engagira mere Miri ka *Rüma tete na ne, kpara biringbö te le ta-ngü te ra gbü ngü la, nda ma. Wüh kpe ka-wü 'buru, ce ra bü kpikpi ra bala. Ah le de Me ce siti

ngü ka-ewü la asidi. ¹⁷ Ma rü ta engagira mere Miri ka wü Rüma la bü kpikpi ra. Fü Me ato wazi fere me-ye, teka fü ra amala ngari Yesu Kurisito fü mere miri la, de mere bi wü kpara, te ewü di gbü nganga na la 'buru. Fü Me aküwa ra esaka mere miri la, ba kpara te küwa gömö kami. ¹⁸ Te di bala ne, ma wu eyi kpo, ga, Me ena aküwa ra fi bala esüka wü siti ngü 'buru. Fü engu aza ra, akoro di kpa gbü sü ka-ye, kpa gbü kpi kpala. Ma gbo nga iri Me teka ngü la! Ah di bala!

¹⁹ Ma to mandï fü Akuwila ake Pirsila, be kpah te wü kpara agba Ünësiforo. ²⁰⁻²¹ Wü Wubulu, Pudene, Linü, bete Kalodiya, abe kpah te wü *kpara ka Yesu de agbü Rüma de kpakine ne, tima kpah mandï ka-wü fü mü. Mü giri da mü, de mü koro kpakine mba kere, angü te ah koro eyi gbü bigü la, kaje ena adi ma teka siti wege gbü jia ngu. Ma ngbü kpakine bü kpikpi ra, angü ta te ma yia teka akoro kpa gbü Rüma kpakine ne, Eraseto ngbü ka-ye ciki gbü Korinito kpala. Ma ce Torofimü, o agbü Mileto de keke te ye.

²² Me di de mü, Timoteyo, be kpah te gara wü kpara ka Yesu Kurisito 'buru, da ele ta-ngü te yi de *züka maguma ye.

Dela adu ngü ka-ra. De-ra Pawülü.

**To Ngü Mürü ka Me bete Gina Ngü (S Sudan)
Mündü: To Ngü Mürü ka Me bete Gina Ngü (S
Sudan) New Testament+**

copyright © 2005 Wycliffe Bible Translators, Inc.

Language: (Mündü)

Contributor: Wycliffe Bible Translators, Inc.

All rights reserved.

2020-11-19

PDF generated using Haiola and XeLaTeX on 21 Feb 2024 from source
files dated 29 Jan 2022

9787304f-bc80-5421-9b63-c767eb819b6f